

ung de
ruchs Nepp 15
m Megt 71

C V D

A I G G

1 6 0 8

83

7


D. C. 74

[Faint handwritten mark]

~~Xi~~
2 A. 6. 895.

00 M

Dieß + Bucher mit d
Der Bucher 112 gg
1. 6. 09.



Kurze vnd warhafftige
beschreibung der Reiß

Von Prag aus /

Durch Schlesien /
Polen /
Moscow /
Tartareyen /

Bis an den Königlichen
Hoff in Persien:

So von Georgio Teodoro
von der Jabel / mit verleihung
Göttlicher hülffe Anno 1605. durch
glück vnd vnglück verrichtet
worden ist.



Leipzig.

In verlegung Henning Grossen
des jüngern / Buchhändlers.

ANNO 1608.

M. G. Gross

Faint, illegible text, likely bleed-through from the reverse side of the page. The text is arranged in several lines within a rectangular border.

14





Dem Edlen / Ehren-

vehsten vnd Hochgelarten

H. Johan Georg Gödelman /

der Rechten Doctorn / Churfürstlichen

Sächsischen Rath / Comiti Palatino, vnd

Abgesandten an der Röm. Kay. May.

Hoff / Meinem günstigen Herrn

vnd freunde.



Hier / Ehrenveh-

ster vnd Hochgelarter

insonders günstiger

Herr vn̄ freund / Nach

erbietung meiner bereitwilligen

dienste / auch trewer wünschung

aller heilwertigen wolfsart beuorn /

Stell ich in keinen zweiffel / er sich

zu erinnern wisse / welcher gestalt

er mich zu Budisin / als er von

dem Durchlauchtigsten Hochge-

bornen Fürsten vnd Herrn / Herrn

A ij. Chri-

Vorrede.

Christian dem andern / Hertzogen
zu Sachsen / des heiligen Röm.
Reichs Ertzmarſchalch vñ Churz
fürſten / Landgraffen in Thürin-
gen / Marggraffen zu Meißen /
vnd Burggraffen zu Magdeburg/
meinem gnedigſten Herrn / in
Schleſien nach Breslau verſchickt
worden / zu ſich eingeladen / vnd mir
alle ehre vnd freundschaft / dafür
ich freundlich danckbar / erzeiget.

Wann dan vnter andern geprez-
chen / ich auch dem Herrn vber tiſch
meine reise in Perſien / die ich an
meines vnter wegen verſtorbenen
Herrn des Key. Geſandten ſtat /
jedoch vnwürdig / mit verleihung
Göttlicher hülff (durch glück vnd
vnglück / wie es vff ſolchen gefehr-
lichen reisen zuzugehen pſeget / ver-
richtet) erzehlet / Auch das Kleid
vnd den Sebel / welchen der König
aus

Vorrede.

aus Persien an seinem leibe getras-
gen / vnd mir verehret / gezeiget /
darneben auch vermeldet / das er
mir noch darüber 900. mehrer teils
Churfürstliche Sächsische Taler /
so in demselben Lande in grossen
werth sein / zustellen lassen: Vnd
den Herrn darüber ersucht / mich
bey höchstgedachter Ihrer Churf.
Gn. als meinem gnedigsten Herrn /
vnter dessen hochlöblichen vorseh-
ren / weiland Hertzog Georgen /
vnd Churfürst Mauriti in Sach-
sen / Christmilder gedechtnis / mein
lieber Grossvater / seliger / eine
gute zeit den Kirchen zu Dresden
vnd Weissen gedienet / auch her-
nach Superintendens zu Weissen /
vnd des daselbsten löblichen Con-
sistorii Assessor gewesen / vntertzes-
nigt zu recommentiren / Vnd dan
der Herr vor gut angesehen / das

A iij

ich

Vorrede.

ich solch mein Itinerarium in offe-
nen Druck publicirē lassen wolte.

Als hab ich solches niemand an-
ders als dem Herrn hiemit dedicati-
ren wollen / mit freundlicher bitt /
solche dedication in aller freunds-
schafft auff = vnd anzunehmen / vnd
mein günstiger Herr vnd Freund
sein vnd verbleiben. Hiermit vns
alle in schutz des Allerhöchsten bes-
fohlen. Datum Budisin den 8.
Julii / Anno 1607.

Des Herrn jederzeit
dienstgestiffener

Georgius Lectander.

Dem



Ennach die
Röm. Kay. auch
zu Hungern vnd
Behemen Kö-
nigl. Mayt. vn-
ser aller gnedig-
ster Keyser / König vnd Herr / etc.
Herr Rudolphus der Ander /
von Gottes gnaden / nach gnug-
samer Ihrer Mayestat berath-
schlagung vor gut angesehen /
dem auch Durchleuchten König
vñ Herrn in Persia Schach Ab-
bas, auff seine vor ehlichen jah-
ren / als Anno 1600. Botschafft-
ten / der eine mit namen Hassan
Alibecus eines alten Persiani-
schen Adelichen Geschlechts vnd
herkommens / vnd Herrn An-

A iiii thoni

thoni Schirles von auch vorne-
 men Englischem Geschlecht / al-
 lergnädigst zu beantworten / hat
 dieselbe zu verrichtung solches
 werckes gewürdiget vnd ersehen
 den Edlen vñ Bestrengen Herrn
 Stephanum Kakasch von Za-
 lenkementii / aus vornemen Ade-
 lichem Siebenbürgischem Ge-
 schlecht vnd Nation / denselben
 Anno 1602. allergnädigst abge-
 fertiget / welcher seine Reise vol-
 gends den 27. Augusti ermeldtes
 jahrs ins werck gesetzt / vnd sei-
 nen nechsten weg von Prag aus
 durch Silesiam, Poloniam, Mo-
 saviam, Lithvaniam vnd Albam
 Rufsiam genommen / seynd also
 von Prag aus auff Schweidnitz
 kommen / so eine schöne Stadt/
 mit schönen Gebewde / Mawren
 vnd

vnd Gräben gezieret / daselbsten
 wird auch zum gedechtnis eines
 alten Herzogs Schwert behal-
 ten / welches ohne gefehr vier el-
 len lang / vnd von keinem allein
 mit dem Arm aus der Scheiden
 entblöset werden kan / neben
 auch einem sehr schönen vñ gros-
 sen stück geschütz. Hernacher
 den andern tag seynd wir gen
 Breslaw / so auch vnter die
 schönsten Städte Deutscheslan-
 des gerechnet werden kan / an-
 kommen / vnd folgents nach der
 Dels / daselbsten Carolus Fürst
 zu Münsterberg residirt / vnd al-
 so den 2. Septembristag nach
 Wartenberg / da Herr Abraham
 Burggraff Freyherr von Doh-
 na seinen Residenz / vnd eben zu-
 mal Röm. Kay. Mayr. Gesanter

A v nach

4
nach Moscau gewesen / welchen
Herr Stephanus Kakasch be-
sucht / vnd sich mit ihme allerding-
es der Reiß halben vnterredet /
auch Schreiben von ihme an des
Magni Moscovia Ducis Can-
cellarium genommen.

Hernacher den 3. Sept. ist der
Kay. Gesandte Herr Stephanus
Kakasch zu Chyestacoa ange-
langet / daselbsten ein sehr schön-
es Stiffte vnd Kloster / etwan
ein viertel meile von erwehntem
Städtlein liegend / geschicht aus
vielen ortē / als nemlich Deutsch-
land / Welschland / Polen vnd
Hungern / dahin grosse Wähl-
fart / daselbsten der Legat die
Kirch vnd Gotteshaus besuchet /
vnd also ferner den nechsten weg
nach Grafaw genommen / welche
die

die Hauptstad in Polen / vnd
 penes Vistulam ligt / da den auch
 die Königliche Hofhaltung ge-
 meiniglich ist / hat daselbsten ein
 schönes Schloß / so etwan auffm
 Berge / vnd zimlich fest mit drey
 Kirchen / vnter diesen eine Eccle-
 sia Cathedralis , darinnen drey
 hundert Canonici , die allezeit
 vnterschiedliche stunden Mor-
 gents vnd Abends ihre horas
 mit singen verrichten müssen.
 Der Bischoff daselbsten jehrli-
 chen ober die sechzigtausend Kro-
 nen einzukommen / die vornem-
 sten Canonici auch mehren teils
 ire eigene Dörffer vnd Landgü-
 ter haben. Diese Stadt Crakaw
 wird in drey theil getheilet / Der
 erste theil wird Crakaw / der an-
 der Casimira , das dritte vnd
 letzte

lechte Clepardia genennet / In der
Schloß / oder Thumbkirchen ist
ein ganz silberner Altar / auch
S. Stanislai Begrebnis vnd rech-
te Hand / so in Gold eingefasset /
vnd in grosser reuerenß allda ge-
halten wird.

Folgendß den 11. Septembris
ist der Keyserliche Legatus per
Masoviam, Lithvaniam & Al-
bam Rulsiam gereiset / vnd wird
in denselben Landen wegen der
Kriegesleute vnd Gosaken / so
gleich in Dieffland aus vnd einge-
zogen / auch Pest halber sehr an-
gefochten / 14. Septembris zu
Warschau ankommen / so die
Hauptstadt in Mosavia, ist auch
eine schöne Stadt / vnd nicht
vbrig groß. Es ist auch ein schön-
es Königliches Schloß oder
Sitz

Sitz daselbstien / vnd lieget auch
 an dem Fluß Weichsel / da eine
 schöne vnd von holz gebawete
 Brücken. Von diesem ort nach
 Grodna den 20. Septembris an-
 kommen / da denn der König Ste-
 phan. Bathori ein schönes hauß
 an dem Fluß Nereßsch erbawet.
 Von dannen aus haben wir Pest
 halber grosse gefahr ausstehen
 müssen / vnd etlich mal im Holz
 ohne essen vnd trincken liegen.
 Den 29. Septembris Vilnam ap-
 pulimus zweymal vnter weges
 vnter die Gosaken / welches ein
 schlimmes raubrisches volck ist /
 kommen / welche mit auffgestri-
 chenen Hanen vnd geladenen
 Röhren vns angesprenget / aber
 nichts (weil wir ertichtet / daß
 mein Herr ein Hauptman / vnd
 dem

dem Gaubler ins Lager zuges
 schickt were) vns thun dürffen/
 weil sie auch des Königes Pass
 brieff / so mein Herr bey sich ge
 habt auffgezeiget gesehen / ist eine
 sehr grosse Stadt / vnd ligt von
 Grafaw 110. Deutscher meilwe
 ges / Es pflaget da der König et
 liche tausend Tartern zu halten /
 so da vmbher wohnen / deren et
 liche vns zu beileiten / damit wir
 desto sicherer vnd vngehendert
 der Cosaken halber fortkommen
 vnd passiren möchten / zugeord
 net. Von dannennach Moscau
 seind wir ferner gezogen / vnd auff
 eine Stadt / so ganz von Holz
 auffgebauet gewesen / Münsko
 genennet / kommen / auch den
 Polen zugehörig / da denn auch
 ein so schlimmes / vnbendiges /
 ruchs

ruchloses volck / das davon nicht
 gnugsam gesaget werde. Der
 Hauptman oder Staresta daselb-
 sten / nach dem er vns fragen vnd
 ansprechen lassen / woher wir ke-
 men / vnd wohin wir wolten / hat
 mein Herr ihme zur antwort ge-
 ben / Er were des Römischen
 Keyser Abgesandter zu dem
 Großfürsten nach Moscau. Hat
 man vns verspottet vñ außgela-
 chet / meldend / Ob der Römische
 Keyser dem keinen vornemern
 Potentaten / als eben den Mos-
 cabiter zum freunde haben könnte.

Folgenden 6. Octobr. ist der
 Keyser. Gesandte mit Gottes hülff
 zu Orsa glücklich ankommen /
 vnd daselbsten empfangen / vnd
 gar wol vom Baywoden tracti-
 ret worden / auch acht tage / bis
 man



man zuvor einen Boten nach
 Smolensky nach gebrauch ab-
 gefertigt / welcher den Mosca-
 witem unser ankunfft verkün-
 diget / erwarten müssen / vnd
 hernacher den 14. Octobris von
 Orsa wiederumb abgereiset / dens-
 selben tag sieben meilen bis zu
 einem Dorff Bajova genennet /
 da wir pernoctiret, verrich-
 tet. Von dannen wir morgens
 frühe durch einen Wald / mit na-
 men Vata, vnten an einem Fluß /
 welcher albam Rufsiam, so noch
 dem Polen zugehörig / vnd das
 Moscawiterische Land scheidet /
 kommen / auch von den Kaiser
 Kainira / so viel als Grenß ge-
 nennet wird. An demselben ort
 ist ein Moscawiterischer Reuter
 auff vns schnell hinzu geritten /
 fraz

fragend / Ob des Römischen
 Keyfers Botschafft verhanden
 were / Als er bericht von uns
 vernommen / ist er vom Ross ab-
 gestiegen & ritu populari, dar-
 auff er nach empfangenem be-
 richt uns zu warten / vnd still zu
 stehen anbefohlen / vnd wieder-
 umb in Wald sich gemacht. Nach
 diesem seind zwölff Personen / so
 köstlich bekleidet gewesen / uns
 entgegen mit den mundpfeiffen
 more solito kommen / mit ver-
 meldung / daß sie von dem Pala-
 tino oder Baywoden von Smo-
 lensky den Herrn Gesandten zu
 entpfangen abgeferrigt weren /
 vnd seind also mit ihnen fortge-
 zogen (die Moscawiter kleine
 Paucken von Messing an Sät-
 teln hengen gehabt) vnd den

B

Mosca

Moscowitern von Dainen an/
 wie sie uns geführet/ folgen müs-
 sen / Endlichen gar sacht vnd
 langsam fortgereiset / Vnd den
 19. Octobris gen Smolensko/
 welche an dem Fluß Nepris ligt/
 glücklichem angelanget / ist der
 Moscowiter erste Stadt / ein
 grosses weitleufftiges hölzernes
 wesen / vnd gar nichts fest / aber
 sehr Volckreich.

Folgenden 21. Octob. hat man
 uns sechs Wagen / vnd zwey
 Rosß zum reiten gebracht / vnd
 seind also mit dem Moscowiteri-
 schen Geleit ferner gerückt / so
 auch ire Wagen mit Proviand/
 als mit Bier / Meet / Brantens-
 wein / vnd allerley Fischen / fleisch
 vnd Brod gar wol versehen / vns
 auch zweene vorneme vom Adel /
 so

so alles verschaffet / verordnet
 worden / vnd also folgenden 25.
 Octob. ad primum Municipi-
 um, so Darabusa genennet / kom-
 men / Arx igneis munimentis
 circumducta, da wir ein Kloster /
 ohngefahr ein meilweges von er-
 meldter Stadt angetroffen / so
 in einem Walde ganz einsam ge-
 bauet gewesen. Von diesem ort /
 als den 26. dieses / seind wir fer-
 ner in ein Moskawiterisch Städ-
 lein / so Coruosoumisia genen-
 net / kommen. Folgenden 27. Oct.
 nach Parissloua, so ohngefahr 5.
 oder 6. Deutscher meilen von er-
 meldtem ort ligt / doch etwas lu-
 stiger / als vorgehendes / aber
 alles von holze / außgenommen
 etliche Kirchen / so von Steinen
 nicht hoch / vnd mit drey oder

B ij fünff

fünff runden Thürmen / der mit-
 lere hoch / vnd die auff den seiten
 etwas nidriger / fast auff die
 Heydnische vnd Türckische art
 gebawet / Auff die spizen dersel-
 ben pflegen sie grosse dreyfache
 Creutz / die heilige Dreyfaltig-
 keit damit andeutend / zu setzen /
 darfür sie auch / wenn sie des
 morgens außgehen / in grosser
 andacht ihre Knie beugen / vnd
 das haupt zu neigen pflegen / ha-
 ben in erwehnten Kirchen auch
 viel Glocken / aber daß sie gar
 auff ein andere art / als bey uns
 breuchlichen / zu leuten pflegen /
 schlagen mit dem Klöppel bald
 an eine / bald an die ander / vnd
 so fort an.

Den 29. Octobris hernacher
 seind wir zu einem Städtlein
 Was

Maseisko kommen / daselbsten
wir acht tage stille liegen müssen/
bis dem Großfürsten vnser an-
kunft ist angemeldet worden.
Dieser ort ligt 85. Moscauiteri-
sche Werß von Moscau / 5. werß
thun so viel als eine Deutsche
Meilweges.

Den 6. Novembr. ist die Post
wiederumb aus Moscau kom-
men / so uns fortzuziehen auff-
legt / Seind demnach den 7. die-
ses auffgebrochen / vnd zu einer
Stadt Visovia genennet / kom-
men / so an einem sonderlichen
schönen vnd lustigen ort / vnd oh-
ne gefehr noch eine Tagereise von
Moscau liget / dahin der Groß-
fürst sich mit Jagten zu erlüsti-
gen offters zu reisen pfeget. Vnd
denn folgents den 9. Novembr.

B iij Gott

Gott lob / glücklich in Moskau
 angelanget / ohne gefehr umb 2.
 vhr nach Mittage / vnd mit ei-
 nem grossen Comitatz der Mos-
 kauwiter ein Meilweges aussers
 halb angenommen worden / so
 vns bis in vnser Losament / da
 denn alles schön außgeputzt / vnd
 zugericht / geführet / von dannen
 wir auch gar nicht weder spazie-
 ren / oder sonsten vns umbzuse-
 hen außgehen durfften / sonsten
 was wir etwan auff die reiß ein-
 zuffaffen in willens gehabt / ist
 vns von Wächtern / so vns be-
 wachet / zugetragen worden /
 Essen vnd trincken aber belang-
 gend / hat man vns / als Meet /
 Bier / Brantewein / auch fleisch /
 Brot / Butter vnd andere not-
 turfft vom Großfürsten alles
 vber-

uberflüssig teglich vnser ordinari
zugetragen / vnd ganz kostfren
gehalten / daß vns gar nichts
gemangelt.

Die Stadt Moscau belan-
gend / ist dieselbe sehr groß / vber-
aus Volckreich / vnd schier kei-
ner Stadt Deutscheslandes zu-
vergleichen / vnd begreiffte in der
rund vier Deutscher Meilwe-
ges / ist die Hauptstadt vnd Kö-
niglicher Sitz in Reussen lande /
drensfach / Erstlichen mit einem
hölzern geschlossenen Bolwerk /
so in die funffzehen Ellen hoch /
rings ombher / vñ theilet dasselb
Moscovia fluvius, unde urbs no-
men accepit, an zweyen orten
von einander. Die andere oder
mittlere Stadt ist mit einer zim-
lichen starcken Mawren / vnd

B iij

zum

zum dritten das Königliche
Schloß/ so im centro auch mit
einer sonderlichen Mawren vnd
tieffen Wassergraben umbfan-
gen/ Man findet in erwehnter
Stadt ober die tausend Kirchen
vnd Klöster/ vnter welchen zwo
im Schloß sehr herrlich vñ schö-
ne / darinnen ihre Könige begrab-
ben/erbarwet/mit sieben Thür-
men/so sehr herrliche vergüldete
Dächer/auch schöne grosse Glo-
cken / vnter denen eine/ so die zu
Erffurt an größe vnd klänge v-
bertreffē thut. Vor dem Schloß-
thor auffm platz zwey grosse stück
geschützes/ das ein Man mit ge-
ringer mühe hinein kriechen
möchte.

Folgenden 17. Novemb. hat
mein Herr der Keyserliche Legat
ben

bey dem Großfürsten Boris Fœ-
 drouitzsch, welchen die Mosco-
 witer Tzar oder Keyser nennen/
 gnedigste audiencz gehabt / deme
 hat man morgens gar frue neun
 schöner Kosse / so sehr wol gepuht
 gewesen / ins Pofament gebracht /
 vnter deren eines mit einer köst-
 lichen Satteldeck von rothem
 Sammet vnd Gold gesticket /
 auch das Zeug alles mit Silber
 beschlagen / vnd mit Edelgestein
 versehen / Die andern Kosse a-
 ber / darauff wir geritten / seind
 etwas ringer / jedoch schön ge-
 puht gewesen / in zwo stunden
 ohngefehr hernach ist vnser Pro-
 vitor, so ein vornemer ansehenli-
 cher alter Man / neben andern
 vornemen Moscowiterischen von
 Adel zu vns kommen / vnd vns

B v zur

zur Audientz geladen / Vor dem
 Hofament aber seind viel vorne-
 me vom Adel in ansehnlicher
 schöner Kleidung / vnd wolge-
 pußten Rossen gehalten / so uns
 biß ins Palatium hinein geleit-
 tet / welches denn auch mit Tap-
 peten vnd herrlichen schönen ge-
 melden ist zubereitet gewesen / der
 Thüren oder eingang gegen ober
 ist der Thronus gleich in der mit-
 ten / neben einem andern zuge-
 richtetem Stul / so auff der linckē
 seiten mit vier stoffeln erhöhet /
 darauff der Großfürst in seiner
 Majestet mit einer güldenen
 Kron / güldenen stück biß auff
 die füß (welcher in seiner hand
 einen schwarzen stab / oder Re-
 giment mit gutem golde beschla-
 gen / gleichsam einem Zacken ge-
 fühz

führet) neben ihm aber sein sohn
 Foeder Borissovitze genennet / in
 einem sprenglichten kleide / gleich
 als ein Luchsenhaut gefessen /
 auff jeder seite seind zweene Heu-
 ducken mit ihren Parten in weis-
 sen kleidern gestanden / vnd dann
 ringes vmbher die vornembsten
 Räthe / so auch alle in köstlichen
 kleidern vnd schwarzen Fuchsz-
 müßen gefessen. Nach dem in der
 Reys. Gesandte seine gebürliche
 Reuerenz verrichtet / vnd ihme
 dem Großfürsten die Keyserliche
 Gredensschreiben vberantwortet
 / ist der Großfürst auffgestan-
 den / vnd gefraget / wie es dem
 Großmechtigen Römischen Key-
 ser Rudolpho, seinem vielgelieb-
 ten Herrn Brudern / so wol derer
 löblichen Herrn Brüdern gienz
 ge/

ge/ vnd ob derselbe auch noch in
 vollkommener gesundheit were?
 Desgleichen vnd ebener massen
 hat der junge Fürst auch gethan.
 Darauff mein Herr der Legat
 geantwortet/ daß ihre Keyserli-
 che Manestat noch (Gott lob)
 frisch vnd gesund weren/ vnd hat
 also folgendes seine Legation/
 was ihme anbefohlen gewesen/
 verrichtet/ Nach dessen verrich-
 tung seind wir widerumb in vori-
 ger gestalt biß in vnser Losament
 beleet worden. Kurz nach die-
 sem seind ober hundert Personen
 mit Speisen vnd allerley Franck
 von des Großfürste Taffel kom-
 men/ so vns in des Großfürsten
 namen verehret/ vnd haben nach
 diesem (jedoch auff des Großfür-
 sten vnkosten) vier Wochen nach
 der

der Audienz verwarten müssen/
 vnd endlich neben andern dreyen
 Dienern / so mein Herr daselb-
 sten angenommen / in Persiam
 hinein fortgereiset / vnter wel-
 chen einer ein Organist / so sein
 eigen Regal gehabt / gewesen/
 welches nach meines Herrn vnd
 des Organisten tod ich neben
 sieben zimmer Zobeln vnd einem
 Mariabildnis de Loreto dem
 König in Persia / weil er dersel-
 ben allbereit erinnert gewesen/
 vngeachtet ich dieselben nach mei-
 nes Herrn befehl / vnd in mangel
 Zehrung gerne verkaufft hette/
 solche aber mir zu verkauffen von
 meinem Provisore widerrathen
 worden / zugestellet / so ihme / son-
 derlich das Regal / darauff er/
 zwar sine arte, gespiellet / gar an-
 genem gewesen.

Terz

Ferner das Land Moscov/ deren Völcker sitten vnd Reli- gion / auch fruchtbarkeit vnd ei- genschafft anlangend / ist das Land betreffend / ein Püschichtes / mehrentheils wildes / wüstes vñ sumpffichts land / voller Brücken vnd Marast / vnd also verschlos- sen / daß ohne des Fürsten zu- lassung oder Paß heimlich her- aus zu kommen vnmöglich / Ist Winterzeit vnmenschliche grosse Kälte vnd Schnee / auch von Obst / Wein vnd andern fruch- ten ganz vnd gar unfruchtbar / Die Städte vnd Häuser mehren- theils alles von holz / vnd son- derlich herrlich / als man bey vns zu bauen pfleget / Erstreckt sich biß an das Mare hyrcanum oder Caspium / vnd noch etwas seiten

halb

halb usque ad Gordeos montes,
 über die fünffhundert und funff-
 zig Deutscher meilweges.

Die Religion und Gottes-
 dienst der Moscoviter aber an-
 langend / wollen dieselben vor
 die frömsten und besten Christen
 genennet werden / da sie doch so
 böse / Epicurische und rohlose
 Leute seind / da onzucht und an-
 dere laster mehr im schwang ge-
 hen / als kaum ein ort in der welt
 erfunden werden mag / halten
 weniger denn nichts von den
 Zehen Geboten / Es wird auch
 ein Ehbrecher oder Todschläger /
 auch andere Verbrecher nur ein
 wenig mit der Gefengnis ge-
 strafft / ist nach dero erledigung
 ärger als vorhin / Sie nennen
 sich nach dem namen Pauli, Pau-
 liner /

liner / als die / so den rechten
 Griechischen Glauben haben /
 vñ pflegen / wie vormalß erweh-
 net / sehr viel Kirchen vnd Klöster
 zu haben / vnd daselbsten ein jeder
 sein eigenen Götzen oder Abgott
 auff ein kleines Täflein gemalet /
 so sie auff ihre Sprache Obras
 nennen / hangen / Als nemlich
 S. Nicolaum vnd S. Basilium,
 die vier Erzengel / etc. achten die-
 selben gemälder so hoch vnd heil-
 lig / als were es die lebendige
 Person / An einem Fest oder
 Feyertage / so sie auff ire sprache
 Brasnik nennen / zieren vnd be-
 stecken sie erwehnte Täflein mit
 brennenden Wachsliechtern / vñ
 zünden offters / wann es etwan
 durch nachlässigkeit versehen
 wird / Hauß vnd Hof damit an /
 wie

wie wir denn solches öffters er-
 fahren haben. Vom beten wissen
 sie auch nicht viel / doch beten sie
 mit diesen Worten: Hospodi po-
 milni mne grechni, das ist so
 viel / als / Gott sey mir Sünder
 gnedig. Von ermeldten Bildern
 pflegē sie auch ein jeder in seinem
 hause hinder dem tisch zu haben /
 vnd so ohngesehr solches schon
 herab von der Wand fiele / vn-
 terstehet sich doch keiner / es sey
 denn / daß von ihren Priestern
 einer dasselb wiederumb gewei-
 het / auffzuheben oder anzurürē /
 alsdenn wenn es geweihet / muß
 er die hende sauber waschen / dar-
 nach wird es ihme vergont auff-
 zuheben. Wenn sie auch in eine
 Stuben oder Zimmer kommen /
 ehe sie einem den gruß anbieten /
 thun

G

thun

thun sie zuuor ermelten Bildern
ihre reuerenß / vnd creuzigen
sich / vnd schlagen den kopff vor
demselben / Desgleichen pflegen
sie auch zu thun / wenn sie vber
Land reisen / nemen sie es auch
mit sich / Es wird auch bey ihnen
keiner vor einen Christen gehalten
/ er habe denn zuuor ein mes-
sings / silbernes oder auch gülden-
nes Creuß am halse tragen /
darauß denn etlich Moscawite-
rische wort außgegraben stehen /
Vnd do einer dasselbe verleuret /
achtet er es vor eine grosse straffe
von Gott / seiner sünden halber /
daß ers nicht werth zu tragen
sey.

Was nun ferner ihre Pfaffen
vnd Priesterschaft anlanget /
pflegen dieselben gar nichts / als
wie

wie bey uns breuchlichen / zu studiren / sondern wenn sie nur ein wort schreiben oder lesen können / seind sie gelehrt grugsam / können auch offters so wenig als andere Leuten kaum ein Vater unser beten / vnd seind die studia gar in keinem werth bey ihnen / Dürfften auch wol sagen / daß allhier im Deutschlande so viel irrthümer vnd Keßereyen aus den studiis herrüreten / vnd kan derentswegen ein jeder / so sich zum Priester begeben wil / gar leicht darzu kommen / er wird aber nicht eher darzuconfirmiret / er habe denn zuvor sein ehelich Weib nach den Worten S. Pauli / Ein Bischoff sol sein eines Weibes Man / etc. Vnd wenn dieselbe stirbet / darff er darnach gar keine andere heyra-
 G ii raten /

raten/sondern muß alsdenn in
 ein Kloster wandern/ vnd Poenit
 tenß thun / vnd für des Groß
 fürsten vnd gawzen Landes wol
 fart beten / vnd in diesem stande
 biß an sein ende verharren. Wie
 derumb geschicht es auch/ daß/ so
 ein gemeiner Man / oder er sey
 gleich wer er wolle/ so der Reli
 gion zugethan / vnter ihnen mit
 schulden behafftet were / oder
 auch bey seinem Weibe nicht len
 ger bleiben wolle / vnd ließe in
 ein Kloster/ so wird er aller deren
 frey vnd ledig / vnd wird solches
 noch vor eine heiligkeit von men
 gerühmet/ wird von niemandes
 im geringsten nicht angesprochē/
 gehet auch kein Recht ober ihn/
 allein daß er sich hinfort die zeit
 seines lebens nicht widerumb
 aus

aus dem Kloster loßwircfen kan/
 muß sich auch ganz vnd gar ver-
 zeihen fleisch zu essen / vnd andern
 Klösterlichen gebrauch vnd saz-
 ungen nachleben / So er aber
 dieses breche / wird er vor einen
 Todtsünder gehalten / auch am
 leibe hart von den andern Mön-
 chen gestraffet / so hart halten sie
 vber ihren fasten / aber sonst
 mag er leben in hureren / vnd in
 andern lastern mehr / das wird
 bey ihnen gar für schlecht gehal-
 ten. Die erwehnten Pfaffen mag
 man an nichts anders erkennen/
 als an ihren langen haaren / die
 sie men von der weihung an gar
 nicht abnemen lassen / vnd an
 ihren stäben / so sie allezeit mit
 sich führen / Man sihet auch / wenn
 sie reisen / gar keine Wehre bey

¶ iii ihnen.

ihnen. In erwehnter Stadt
 Moscau haben sie ihren eigenen
 Papst/den sie Patriarcham nen-
 nen/ so wol auch in vnterschiede-
 nen Städten Quatuor Metro-
 politas, vnd auff die vier Euan-
 gelisten deuten/ auch ihre Erzbis-
 schoffe / Nonnen / vnd andere
 Orden mehr. Den Papst oder
 Patriarcham anlangend/halten
 sie denselben wie vor einen Gott/
 er lesset sich auch nicht / als des
 Jahrs nur einmal / da er in der
 Schloßkirchen Messe helt / ses-
 hen/ ist ein groß gedrang in der
 Kirchen / daß auch offters der-
 zehende nicht hinein komen kan.
 Die Tauffe betreffend / pfle-
 gen sie ihre Kinder gemeiniglich
 im fließenden Wasser / vnd in
 keiner Kirchen / als sonst breuch-
 lich.

lich ist / zu teuffen / vnd zihen das
 Exempel an / gleich wie Christus
 von Johanne im Jordan ist ge-
 tauft worden / Nach gehaltenen
 Tauffe pfleget der Priester das
 Kind zu schmieren vnd zu salben /
 vnd der Mann / so des Kindes
 Pate ist / pfleget dem Kinde an-
 statt des Patengeldes ein kleines
 silbernes / oder darnach er reich
 ist / güldenes Creutz an halß zu
 hengen / ihme damit gleichsam zu
 gratuliren / daß er nun sein Chri-
 stenthumb vnd Tauffe erlanget /
 vnd muß das Kind / wie vor ge-
 meldet / das Creutz fort an an-
 halse tragen. Ebener massen ge-
 schicht auch / wenn ein Junger-
 gesell willens sich in heyratung
 einzulassen / geschicht es nit durch
 beywohnung oder zusammenkunfft

¶ iii

zweyer

zwoyer liebhabenden / oder / das
 sie sich etwan im tanzen / oder
 dergleichen lust ergebeten / Nein /
 sondern die Heyrahtung wird
 ganz vnd gar durch die Eltern
 oder nechsten freunde gestiffet /
 Er der Brutigam bekömpft auch
 nicht die Jungfraw eher zu sich /
 er habe sich denn zuuor wol vnd
 hart verbürget / do fern er die
 Ehe nicht hielte / eine genandte
 summa geldes zu erlegen / alsden
 wird die Braut zu ihm gefüret /
 vnd in beysein seiner vnd ihrer
 Freundschaft ihme gleich ver-
 trawet / vnd an die hand gege-
 ben. Endlichen wird sie blind mit
 einem sendenen tuch verhangen /
 von zwoyen vornemen Weibes-
 personen aus der Freundschaft
 zur Kirchen geführet / vnd wird
 also

also die Ehe durch den Priester
bestetiget / vnd hernach also das
Weib von ihrem Manne einge-
sperrret / als wie ein Vogel ins
Gebaswer / darff sich auch vor
ihrem Manne keinen andern se-
hen lassen / vnd wenn es schon
des Mannes leiblicher Bruder
were.

Ihre todten Leichnam begrab-
ben oder bestatten sie zur Erden
mit grossen heulen vnd geschrey/
darzu sie denn kleine Buben
brauchen / so der Leichen nach-
lauffen / je mehr die schreyen / je
vornemer vnd ansehenlicher das
begrebnis bey inē zu sein scheint.
Sonsten ihre sitten vnd mores
belangend / seynd die Mescowit-
ter grobe vngeschliffene Leute/
selten trew gegen den Deutsche/

G v vns

ungeachtet / wie vorgemeldet /
 sie sich die besten Christen nen-
 nen / vnd nicht zugeben / vielwe-
 niger leiden können / daß ein an-
 ders Land vnd Nation inen solte
 vorgezogen werden.

Ferner seind wir wiederum
 aus Moscau fortgereiset / neben
 des Großfürsten geleit / so vns
 auff die Reise zugeben / vnd
 den nechsten Weg nach Cassan /
 so die Hauptstadt in Ceremissia,
 vnd den Ceremissischen Tartern
 zugehörig gewesen / genommen /
 ligt von Moscau tausend Wel-
 scher meilweges / oder Mosco-
 witsche Werst / vnd ist so viel als
 zweyhundert vñ funffzig Deut-
 scher meilen / vnd vns erste auff
 eine Stadt kommen / so Blodi-
 ner nach einem Könige / so sie
 er

erbarwet/also genennet / vnd das
 selbsten auch begraben ligt / wel-
 che Stad die Moscowiter vnter
 die eltisten vnd vornemste städte
 ihres Landes rechnen / ligt hart
 an dem schönen Fluß Volga, so
 etliche klafftern tieff / vnd biß in
 das Caspische Meer Schiffreich
 ist / In diesem ort ist so ein ober-
 aus schöne gelegenheit / da von
 Fischen / Wiltpret / vnd anderer
 notturfft die menge / vnd nicht
 gnugsam zu loben ist / Man kan
 auch allda Sommerszeit auffß
 Wasser sitzen / vnd in die 400.
 Deutscher meilen biß gen Astar-
 can, auch gar biß ins mare Ca-
 spium hinein fahren / vnd ligt
 zehen Tagreisen von Moscow.
 Hernacher seind wir ferner zu
 Land fortgereiset / vnd gleich an-
 fanges

fanges des Advents auff eine
 Stadt Muron, oder klein Nawo-
 gart genennet / kommen / auch an
 erwehntem Fluß ligend an der
 Tartarischen Ceremissische grenz-
 ze / vnd an einem sehr schönen
 vnd lustigem ort. Nach diesem
 seynd wir widerumb auff ein an-
 der Stadt Nisna genennet / kom-
 men / so der halbe weg / vnd fast
 ober hundert meilen hinder Mo-
 scaw / vnd endlichen in die Tar-
 taren Ceremissiam, welches wi-
 derumb ein vnheimliches / wil-
 des / püschichts vnd marastichts
 Land ist / da man denn Speiß /
 vñ alles was man zur notturfft
 bedarff / muß mit sich führen /
 Dieses volck wohnet vnd nehret
 sich mehren theils alles in Wäl-
 dern / ihre Speisen seind Ross-
 fleisch /

fleisch / Milch vnd Honig / haben
 zwar ihre Ackerbau / aber gar
 nicht gemeine / vnd were allda zu
 lande vnmüglich fortzukommen /
 weñ dieses Land nicht mit zwang
 vnter die Moscowiterische ge-
 walt gebracht were.

Diese Völcker muß man alle
 mit zwang vnd streichen zur Ar-
 beit zwingen / seind also mit zim-
 licher mühe vnd verwunderung
 durch dieses Land gereiset / vnd
 nach diesem in eine Stadt / dar-
 innen wiederumb Moscowiter
 gewohnet / Schvviasko genen-
 net / kommen / vnd hernacher am
 heiligen Christabend nach Cas-
 lan, so auch eine ziemliche grosse
 Stadt / vnd in der größe der
 Stadt Breslaw gar wol zuver-
 gleichen / jedoch alles von Holz
 ge-

gebawet / vnd mit einem hölzernen
 Bollwerk vmbgeschlossen / die
 Burg vnd Festung liget auch in
 der Stadt auff einem Berge /
 vnd mit einer zwiefachen mawre
 vmbgeben / darvor das flusz oder
 das wasser Cassan, dauon auch
 die Stadt ihren namen hat / vnd
 ist eben der Elben allhier in vn-
 fern Landen zuuergleichen / vnd
 rümet ein meilweges von der
 Stadt in den flusz Volga. Diese
 Stadt ist von dem Tyrannen
 Ivano Basilovitz, Großfürsten
 zur Moscau / vnter das Mosco-
 witerische Reich bracht. An die-
 sem ort haben wir den ganzen
 Winter vber bleiben müssen / bis
 auff den 11. Maij, aber gleichwol
 auff des Großfürsten vnkosten /
 da wir dan mit essen vnd trinckē
 aller

aller notturfft nach versehen
 worden / Es ist vns aber / wie zu-
 vor in Moscau / außzugehen
 gar nicht gestattet worden / Ged-
 achten 11. Maij seind wir auff
 dem flusz Volga in die drey hun-
 dert Deutscher meilen biß gen
 Astarchan, so die Hauptstadt in
 Nogay / vnd ebener massen vor
 ehlichen Jahren von obermeltem
 Ivano Basilovitzsch eröbert wor-
 den / gefaren / ist nicht sonderlich
 starck vnd groß / vnd mehrens-
 theils auch alles von holz auff-
 gebawet / darinnen auch ein
 Schloß zu des Basilovitzsch ze-
 ten erbawet worden / mit einer
 einfachen mawren / auch mit dem
 flusz Volga, wenn er sich ergeußt /
 gleichsam einer Insel vmbgeben /
 geschiffet / den 27. Maij 1603. Da-
 selbst

selbsten ankommen / vnd vber
zwen Monat / ob wol mit grosser
vngelegenheit / jedoch auff des
Großfürsten vnkosten / haben liz-
gen müssen.

Dieses Land Nogay betref-
fend / ist dasselbe gar ein ödes vñ
wüstes land / ganz vnd gar ohne
Städte / Dörffer vnd Gebewde /
wird auch vnter diesen dreyhun-
dert meilweges nichts mehr als
drey Städtlein / so hart an dem
Fluß Volga ligen / vnd von dem
Moscowiter zur Wehre vor die
Zartern auffgebawet worden /
befunden / vnd werden genennet /
das erste Samara, das ander Sa-
rata, das dritte Zaritzon, ligt ei-
nes von dem andern hundert
meilweges / ist sonsten ein ebenes
Land / wenig Holz vnd frisch
Wasser /

Wasser / sondern mehrertheils
 gesalzen Wasser darinnen / wird
 viel weniger getreidig oder sonstē
 etwas daselbsten gezeuget / da
 doch ein herrlicher vnd köstlicher
 Boden / als nimmermehr in
 Welschland von vielen herrlichē
 Kreutern / Lavendel vnd andern
 zu finden ist / Vnd ist dieses die
 vrsach / die Zarteren können nicht
 auff einer stelle verbleiben / son-
 dern ziehen von einem ort zu dem
 andern / erhalten sich ebener mas-
 sen / wie zuuor von den Geremiss-
 sen gemeldet / von Ross / Schafs-
 fleisch vnd deren Milch / die sie
 denn absieden / sauer machen /
 vnd in lädern säcken mit sich füh-
 ren / wissen von gar keinem brot /
 so wol auch von keiner Münz /
 sondern wenn sie etwas handeln

D oder

oder kauffen wollen / geben sie
Wahren vmb Wahren / ire h user
ser vnd h tten / so gemeiniglich
von Filz gemacht / vnd inwendig
mit Baumwolle gef ttert / die
f hren sie mit sich auff einem was
gen / Sonst  verkaufft einer dem
andern der Vater seine Kinder /
der Herr seine vnterthanen / oder
leibeigene Knechte / wie das vihe /
Pflegen vnter ihnen / so sich wol
im Kriege verhalten / einen zu
ihrem Mursti oder K nige er
wehlen / welchen sie / einer vmb
den andern ernehren / als wie die
Bienen ihren Weisel / halten
auch so viel Weiber / als sie er
nehren k nnen / Verkauften die
selben wiederumb / wenn sie nicht
Kinder mit ihnen zeugen k nnen.
Deßgleichen thun sie iren T ch
tern

tern auch / geben sie vmb Bihe /
 In summa / es ist ein sehr böses
 vñ vntrewes volck / were auch da
 zu lande gang vnmüglich fortzu
 kommen / wegen der grossen men
 ge der Schlangen vnd ungezie
 fers / vñd kan niemand vffm
 Lande seine herberg sicher haben /
 es sey denn das Gras abgebren
 net / welches / so es angezündet
 wird / etliche viel meilwegs bren
 net / vñd wird eben durch diese
 mittel das ungezifer vertrieben.

In vorerwehnter Stadt A-
 starchan findet man noch ihre /
 der Tartarischē Könige gar vhr
 alte monumenta vñd begräb
 nisse / darauff sie denn gemeinig
 lich pflegē Thürme oder wie Ga
 pellen zu bauen / vñd wenn sie
 darzu kommen / allezeit lebendig

D i s f e w e r

ferwer darinnen zu behalten pflēgen.

Als wir nun ziemlich lange daselbsten / bis die Schiff vnd andere nottursste zur Meerfahrt fertig gemachte / erwartet haben / ist endlich ein Polnischer vom Adel mit namen Christoff Pawlowßky / so in Polnischer / Deutscher / Lateinischer / auch Spanischer vnd andern Sprachen mehr / gar wol erfahren gewesen / zu uns kommen / so von Ormus durch Moskau in Polen zu verreisen in willens gewesen / vnd weil keiner dieser ort / außgenommen Botschaftweise / durchgelassen wird / daselbsten vorarrestiret / vnd meinen Herrn umbförderung gebeten / mein Herr ihn angenommen / welcher wiederumb

derumb mit vns zu rüch in Persiam hinein verreiset. Seynd demnach am tag Mariae Magdalena wiederumb auffgefessen/vñ biß in das Caspische Meer/ dar ein die Volga leufft/ vnd vber etlich hundert Deutscher meilweges breit ist/ theils den Persianern / theils den Moscovitern/ auch Türcken vnd Tartern zugehörig / mit einem Persianischen Kauffman gefahren/ wiewol wir zween ganzer tage grosse tempesta außgestanden/ Demnach den 8. Augusti gen Langeran, so eine meilweges vom Meer liget/ vnd in die Prouinz Gillan, welches ein schönes lustiges ort / jedoch sehr warm / vnd wegen der nähhe des Meers sehr vngesund ist/ vñ den Persianern zugehörig / an

D iij

kom

kommen / an demselben ort wir
 ohngefahr neun oder zehen Wo-
 chen lang in grossen elend vnd
 armut / da wir weder zu essen
 noch zu trincken gehabt / allein
 das vngesunde wasser / so ex ma-
 ri Caspio fleust (ob zwar an
 Weinsachs kein mangel / jedoch
 die Persianer denselben nicht
 auspressen / viel weniger trinckē
 dürffen / sondern dörren densel-
 ben / vnd wird also verkaufft /
 dessentwegen denn auch mein
 Herr / vnd alle die vnserigen / de-
 rer vnser achte gewesen / krank
 worden / der Pawlowßky aber
 gestorben. Von dannen an dem
 mein Herr ein eigen Boten nach
 Hispasia, vorzeiten in Parthia
 gelegen / so jekund die Hauptstad
 in Persia / vnd sedes Regia ist /
 welch

welches grosser vier Behen Tage
 reisen zu Ross / vnd ohngefehr
 hundert vnd zwanzig Deutscher
 meilweges macht / geschickt / dem
 Könige / so damals anderswo ge-
 wesen / vnd Patri Francisco di
 Costa Päpstlichen Gesandten
 zugeschrieben / vnd umb erledig-
 ung diß orts gebeten / Hierauff
 Don Rhobert Schirle hiesgen
 gewesenen Engellenders Bru-
 der / den er pro obside gelassen /
 vnd der zweiffels ohn allda ewig
 wird verbleiben müssen / zu mei-
 nem Herrn kommen / vnd vns
 abholen wollen / aber wegen mei-
 nes Herrn schwachheit / den wir
 auff einer Tragen durch Perso-
 nen biß gen Lanzan, so nicht ober
 zwei meilen ist / tragen lassen / ver-
 bleiben müssen / An diesem ort

D iiii hat

hat er drey tage gelebet / Vor sei-
 seinem tode aber mir vnd meinem
 andern gesellen / was mit Ihrer
 Rens. Mayt. Brieffen zu thun /
 instruction gegeben / daß ich die-
 selben also vermachtet trewlich
 vberantworten solle / befohlen /
 vnd also Christlichen mit guter
 vernunfft den 25. Octobris anno
 1603. verschieden / vnd seinem
 begeren nach vnter einen Baum
 vnserer Herberge begraben wor-
 den. Doch hat meines Herrn in-
 struction zuuor der Oberheupt-
 man desselben orts Lanzan, vnd
 meines Herrn Portatera, welches
 mein Herr seliger selbstem versie-
 gelt hat / noch bey seinem leben
 auff seine bewilligung auffge-
 macht / die sachen perlustriret /
 zweiffels ohne er solches / was
 dar-

darinnen gewesen / seinem Könige
 ge werde zugeschrieben haben /
 darinnen sieben zimmer Zobeln /
 sampt einem Futter / vnd seine
 Kleider funden worden. Die
 Kleider / weil ich sonst keine ge-
 habt / denn mein Herr vns zu
 Hispagan erst zu kleiden willens
 gewesen / ich vor mich gebraucht /
 die Zobeln neben dem Regal vnd
 Mariabildnis ich nach Tauris
 auff einem Esel / den mir der O-
 berhauptman desselben orts zu-
 gegeben / auch neben einer Per-
 son vom Adel / wie oben gemel-
 det / geführet.

Den folgenden 26. Octob. bin
 ich mit Rhobert Schirle ferner
 nach Caspin, so die erste Stadt
 von hinnen in Persia / ohngefehr
 vnter den Deutschen Städten

D v Bress

Breslaw zuuer gleichen / welche
 gar ohne einige Marer / vnd
 die Gebäuder auff die Türckische
 art von steinen vnd leimen ge-
 mawert ist / fünff Tagereiß gezo-
 gen / vnd meine andere Gesellen /
 so tödtlich krank gewesen / ver-
 lassen müssen / den 1. Novembr.
 ankommen / da denn mein von
 meinem Herrn mir zugegebener
 Gesell auch gestorben / vnd Rob-
 bert Schirle mich gleichesfalls
 verlassen / also allein neben dem
 hiesgen Persianischen / Mosco-
 witerischer sprach Dolmetschē /
 den ich zu Lanzan als unbekant-
 ter / mit deme ich Moscowiterisch
 der notturfft nach / reden könnē /
 auffgenommen / mit besoldung /
 fleidung / vnd anderer notturfft
 versehen / vnd wöchentlich beza-
 len

len müssen/ verblieben / biß gen
 Tauris, so ober die 120. meilwe-
 ges von Caspin dahin ist / da-
 selbst den der König 120000. starck
 in expeditione gelegen / welche
 Stadt sieben tage zuvor der Kö-
 nig vor meiner ankunfft eröbert
 hat / den 15. Novemb zu Tauris
 ohngefehr umb 5. vhr zu abend
 allerfranc angelanget / vnd also
 mehrentheils / weil wir vernom-
 men / daß der König nicht lange
 da verharren würde / tag vnd
 nacht fort biß gen Tauris, da ich
 doch so schwach / vnd das Feber
 vnd Kote rhur mich so mürb ge-
 macht / daß ich nicht allein auff
 ein Ross zu steigen vermocht /
 fortreisen müssen.

Als nun der König / ehe ich
 vom Ross abgestiegen / meiner
 an-

ankunfft erinnert / mich / ehe ich
 die Koff eingestallet / etwas es-
 sen / oder andere kleider auff mich
 nemen könnē / vor sich erfordert /
 den König ich im Palatio zu Tau-
 ris vnter andern seinē Herren vñ
 Rāthen auff der Erden sitzend
 befunden / weil er aber schlechter
 als die andern bekleidet gewesen /
 ich auch keinen Dolmātscher ge-
 habt / vñnd den König nicht er-
 kandt / ich gleichsam verstummet
 also stehen blieben / Hierauff ein
 alter Persianer mich bey der
 hand genommen / zum Könige
 geführet / vor deme ich die hende
 küßend niedergefallen / mir aber
 auffzustehen gewincket / darauff
 ein Welscher Venegat in Wel-
 scher sprach mit mir geredet / den
 ich / ob er Latein verstünde / ge-
 fraget /

fraget / ich ihme auff Latein ver-
 meldet / daß der Römische Key-
 ser zu Ihrer Königlichen Würde
 meinen Herrn gesendet gehabt /
 so zwar zu Gillan selb achte an-
 kommen / aber wegen mänge-
 lung Victualien vnd Weins /
 denn daselbsten / als vorgemelt /
 nichts anders als böse wasser /
 vnd ungeschmacktes Schafs-
 fleisch zubekommen gewesen / selb
 dritte gestorben / viere der unseri-
 gen daselbsten halber todt ver-
 blieben. Ich aber von meinem
 Herrn / so verstorben / befehlich
 gehabt / die Keyserlichen Brieffe
 zu vberantworten: Hierauff der
 König die Brieffe begeret / so ich
 noch auff dem platz in meiner
 Portatera verwahret stehen las-
 sen / dieselben holen wollen / aber
 mir

mir nicht vergönnet worden/
 sondern die Schlüssel abgeben
 müssen/welcher die Brieffe / des
 ren Ihrer Mayestat eines in
 Latein/das ander Welsch / das
 dritte des Großfürsten aus
 Moskau/ sampt den Orationen
 auch in erwehnten Sprachen
 gewesen / also vermacht hinein
 mir in die hende in beysein des
 Königes gebracht / dieselbe ich
 debita reverentia flexis genibus,
 uti instructus fui, mit küßung
 der hende Ihrer Königl. Wür-
 den vberreichet/ der König auch
 solche omni solenni modo cum
 osculo angenommen / mir die
 hand auff den kopff geleet/ und
 mir zu seinen füßen niederzusitzen
 befohlen/ dieselben alsbald selbs-
 ten eröffnet.

Nach

Nach eröffnung der Brieffe/
 ehe sie gelesen worden/ein gefan-
 gener gebundener Türck ins Pa-
 latium gebracht / vor dem Kö-
 nige niedergefallen / dem Kö-
 nige zweene Säbel dargereicht
 worden/die er denn beyde besich-
 tiget/ der eine / deren das Creuz
 vnd Scheiden theils mit Arabi-
 schem Golde beschlagen/ vber etz-
 liche tage mir zustellen lassen/
 den andern Säbel entblößet/
 auffgestanden/ vnd deme für ihm
 liegenden gefangenen oder ge-
 bundenen Türcken / ungeachtet
 er fast gebeten / sine ulla com-
 matione, aut faciei mutatione,
 den Kopff abgehawen / darüber
 ich mich fast entsetzet / intra spem
 & metum sitzen blieben/verwar-
 tende mit dem andern Säbel
 auch

auch meines lebens ein ende / bez
 sorgend / Ihre Mayt. irgend mit
 dem Türcken Frieden geschlossen /
 der König vielleicht dessen berich-
 tet / oder aber / daß vom Frieden
 vielleicht in Brieffen begriffen /
 vnd dessentwegen meinen Kopff
 gelten würde / Aber der König
 sich wiederumb an seine stelle ge-
 setzet / etwan lachend / so mir vns
 bewust / geredet / vnd mir ver-
 melden lassen / die Christen sol-
 ten dasjenige wider die Türcken
 auch thun / er wolte an jm nichts
 erwinden lassen / hernach er mich
 einem seiner Trugsäß befohlen.

Als ich nun in die Herberge
 kommen / er einen Welschen ne-
 ben den Brieffen in mein Los-
 ment geschicket / der das Welsche
 schreiben neben beygelegter mei-
 nes

nes Herrn concipirten Oration
 in die Persianische sprach in bey-
 sein meiner transferiret / vnges-
 acht / er die vrsachen schon aus
 des Moscoviters schreiben ver-
 nommen. Morgendes tages in
 früher tagzeit hat der König mir
 in mein Pofament ein schönes A-
 rabisches Roß geschicket / Drit-
 ten tages als den 18. Novemb. ist
 Ire Königl. Würden von Tauris
 aus / welche auch eine sehr grosse
 Stad ist / auch mit schönen Gär-
 ten vnd Bädern auff die Türckis-
 sche art gezieret / jedoch nicht son-
 derlich fest / vnd hat auch in der
 runde in die drey Deutscher meis-
 lē begriffen / ganz offen vnd ohne
 Mawren / vnd alles nur / wie
 vor gemelt / von leyh vnd steinen
 auffgebauet / etwas zerstöret /

E vnd

vnd mitten in der Stadt ein alt,
 väterisch Schloß mit zweyen
 Mawren vnd gräben vmbgebē/
 mit seinem ganzen Heer / als
 120000. Mann / auch allen sei-
 nen Weibern / die ich zwar nicht
 gesehen / aber wie mir angezeiget /
 in die 500. gewesen sein sollen /
 sampt seinen zweyen von der
 Georgianerin / so des Königes
 aus Georgia Tochter gewesen /
 jetzt aber verstorbenen Söhnen /
 der eltiste Sophi Murfa genandt /
 ohngefehr im 17. jahre / der an-
 der vnd jüngere 7. jahr alt / vnd
 Stultam Mahometh genennet /
 fortgerucket / vnd die Stadt Tau-
 ris mit seinem Volck gar wol bes-
 setzet / auch viel ander Städte
 vnd Festungen / als nemlichen
 Marant, Nachzschirvam, Sul-
 pha,

pha, da man denn den König son-
 derlich schön empfangen / ihme
 zu gefallen / als er eingezogen /
 vber die 50000. Diechter oder Ker-
 Ben auff den häusern in der Stadt
 brennend auffgestecket / Auch wo
 wir vnterweges an eine Stadt
 oder Dorff nahe kommen / ist an
 vnterschiedenē orten außserhalb /
 vnd ohngefehr ein viertel wegēs
 davon das gemeine volck gestan-
 den / runde reihen geschlossen /
 (in deme Mann / Weib vnd Kin-
 der einander bey den henden ge-
 habt / vnd also singend auff ihre
 art herumb getancket / mitteln
 im freiß einer / zwey oder drey
 mit einer Pauken / oder auff ire
 art einem runden Sieb nicht vn-
 gleich mit runden messingen rā-
 dern / vnd auff einer seiten mit

E ij

einem

einem Ploster vberzogen gewes-
 sen / gespielet / vnd also ihrem
 neuen Könige gleichsam gratu-
 lirt / vnd mit grossem geschrey/
 Paucken vnd irem Seitenspiel/
 wie ich vernemen können / nach
 einem jedern lautbarn wort zu-
 gleich auffspringend / glück ges-
 wünschet.

Was nun andere vorneme
 Städte mehr / so in die 54. sein
 sollen / darben ich denn auch ges-
 wesen / wird igtiger Persianische
 Gesandte Ihre Mayt. derentz-
 wegen bericht thun.

Dieses Land Armeniam be-
 treffend / wird dasselbe sonsten
 Armenia minor genennet / gren-
 zet an einem theil mit dem Lande
 Parthia, vnd ist vor etlichen ja-
 ren dem Könige aus Persia / des
 jetzt

jetztregierenden Königes Vater
 Schach Chudabendo, so ziemlich
 alt / vnd darzu blind / so auch des
 Regiments fast oberdrüssig vnd
 satt gewesen / durch seine eigene
 Brüder / deren zween gewesen /
 dem Türcken verrathen / vñ fast
 der mehrertheil eingenommen
 worden. Demnach aber der jetzt
 regierende eltiste Sohn Schach
 Abbas seine mündige jahr errei-
 chet / vnd die Kron empfangen /
 vnd solche verrätheren gespüret /
 hat er alßbald den jenigen den
 Lohn gegeben / vnd seines vatern
 Brüdern die augen ausstechen
 lassen / die andern vnd vornem-
 sten aber / so in ämptern gewesen /
 derer etliche vierzig / alle sä-
 beln lassen / Der eine Bruder ist
 noch am leben / vnd sitzt gefangē /

E iij der

der ander aber kurz hernach gestorben.

Dieses Land ist sehr gebirgig / vnd sonderlich an der seiten des Caspischen Meeres / aber doch von Baumwollen / Seiden / Wein vnd Obst gar fruchtbar. Ferner seynd wir immer fortgezogen / vnd vnter dessen hab ich mit Ihrer Königl. Würden (so ein freundlicher vnd lustiger Herr / den Christen sonderlich wol geneiget / auch zum Kriege / Kossen / vnd was sonst zum Krieg vnd ritterlichen sachen dienet / grosse lust hat / ein sehr guter Schütze / das ich selbst gesehen / das er etlich mal einen Spazzen mit einem Janitzschars Rohr vom Baum oder sonst herab geschossen hat / ist ohngefahr

fehr.

sehr zwen vnd dreissig jahr alt)
 vber die zwanzig mal neben des
 Königs aus Georgia Sohne/so
 dem Könige nechst an der seiten/
 hernacher sein Gambler/ vnd an-
 dern seinen Herren auff der Er-
 den/ihrer gebrauch nach sitzend/
 so ich ganz vngewohnet / gessen
 habe. Da denn ihre Speisen
 mehrentheils von Reiß / den sie
 mancherley weise zuzurichtē wis-
 sen/auch wegen mangelung des
 holzes in Asia, Armenia, vnd
 vberal in Persia, mit Ross, Sa-
 melmist oder Stroh kochen müs-
 sen/Am Wein an des Königes
 Tische ist auch kein vberfluß ge-
 wesen / denn einem jeden densel-
 ben zu trincken / bey leibesstraff
 verboten ist / sondern sie pflegen
 an desselben statt ein gesotten

E iij was

wasser / mit allerley Specereyen
 zugerichtet / zugebrauchen / auch
 so viel personen an der reihen / so
 viel pfleget man auch speisen vor
 jeden eine / außgenommen dem
 Könige drey / oder vier auffzu
 setzen.

Von erwehntem ort seind wir
 weiter fortgezogen / vnd nach
 maln die Festung Irivan belegert /
 so von Tauris vber die 150. Deut
 scher meilen liget / ist ein ziemlich
 starckes Schloß / vnd ein gelege
 ner bequemer fruchtbarer ort /
 zwey meilwegs darvon sind drey
 Kirchen / so etlich hundert jahr
 alt / zwo gar eingefallen / die
 vornemste auff Türckisch Bsch
 fisa genennet wird / geschicht da
 hin aus vielen Landen grosse
 Walfahrten / seind an diesem ort
 eine

eine grosse anzahl geistlicher
 Griechischer Mönche / so sich
 Christen nennen / dahin denn
 Ihre Königl. Würden mich auff
 mein begeren den ort zu besichti-
 gen geschicket / vnd mich durch
 seine Gewardi dahin beleiten
 lassen. Die Türcken / so in der
 Festung in die 40000. starck ge-
 legen / haben sich mehrer theils /
 als Tauris eingenommen wor-
 den / dahin geflüchtet / vnd sich
 ober drey wochen darinnen er-
 halten / vnd sich darinnen män-
 lich gewehret / aber endlich wegen
 manglung munitio[n] sich ergeben
 müssen / vnd alle nach eröberung
 der Festung mehrentheils dar-
 nieder gehawen worden. Nach
 diesem allen hat mich Ihre Kö-
 nigl. Würden vor sich erfordern

E v las

lassen/mir angemeldet / Es were
 zeit / das Ihre Keyf. Mayt. meis
 nem allergnedigsten Herrn ich
 wiederumb antwort brechte / er
 derowegen diesen Legaten mit
 namen Mechtichuli Beeg abge
 fertiget / mich mit einem Königs
 lichen Persianischen Kleid / so er
 selbst an seinem leibe getragen /
 Arabischem Kopf / neuhundert
 Reichs Talern / mehrentheils
 Röm. Keyf. Mayt. vnd Chur
 fürstens zu Sachsen schlag ge
 wesen / auch einen Persianischen
 Säbel / wie vorgemeldet / vereh
 ren lassen / Vom gelde aber habe
 ich meinem Provifori 100. Taler
 geben müssen / so mich ohnegefahr
 sechs Wochen bey ihme behalten /
 vnd bin also endlichen neben dem
 Legaten dē 14. Nov. abgefertiget
 wor

worden. Auch habe ich vnuer
 meldet nicht vnterlassen sollen /
 Als ich eins mals zu Irivan mit
 dem Könige auff der erden / so mit
 Tapeten bedeckt gewesen / neben
 ihme sitzend ihrem brauch nach
 gessen / seind etliche Türcken / so
 sich dem Könige ergeben / von
 ihme gnade zubegeren kommen.
 Weil er aber / wie gemeldet /
 schlecht in roth Tuch bekleidet /
 vnd ich einen roth seidenen Rock
 angehabt / vnd meinen fuß / sal-
 va venia, etwas weiters aus
 (denn mir also creuzweise zu sit-
 zen vnmüglich gewesen) gestre-
 cket / ermelte Türcken mir vor
 meinen Füßen niedergefallen /
 mir dieselben küssen wollen / dar-
 über ich den fuß zu rüch gezogen /
 vnd hefftig erschrocken / der Kö-
 nig

nig mir ins angesicht geschawet/
 vnd gelachet. Folgenden 16. dito
 ist vns vnter weges ein Türckis
 scher Bascha mit 130. Man wol
 gepußt zu Rosse begegnet / da
 wir denn nicht anders vermeinet
 es weren Feinde / seynd aber
 (Gott lob) Freunde gewesen/
 vnd dem Könige aus Persia zu
 hulden zugezogen. Ferner / als
 wir fortgereiset / seind vns 500.
 flüchtige Türcken nachgesolget/
 vnd nur eine halbe Meilweges
 vber nacht von vns gelegen / vns
 aber nicht antreffen / seind also
 dieselbe nacht incontinenti fort
 einen andern Weg ex Asia per
 Armeniam, Alexandriam, so ein
 kleines ödes Ländlein ist / komen/
 darinnē vns der König aus Ge-
 orgia mit 10000. Man dem Kö-
 nige

nige aus Persia zu hülff zihend/
 begegnet / mich sampt den Ges-
 santen zu sich gefordert / vnd vn-
 ter andern reden mich durch ei-
 nen Dolmetsch fragen lassen/
 Warumb Ihre Kays. Mayt. zu
 ihme auch nicht schickten / sin-
 temal er ein Christ / der Persia-
 ner aber ein Heude / er wolle auch
 mit Ihrer Mayt. freundschaft
 machen? Darauff ich geantwor-
 tet / Daß mein Herr / so von Ih-
 rer Kays. Mayt. zum König aus
 Persia geschickt / gestorben were /
 wisse nicht / was er für befehlich
 gehabt hette / Also wir ihn ver-
 lassen / förder per Gordeos &
 mosthicos montes, qui asperri-
 mi sunt, vnd gar mit Rossen /
 auch sonsten der Gumocken vnd
 Tartern halben (von denen ich
 mich

mich durch hülffe des Gesanten
 mit einem Roß/eblichen Zalern/
 vñ einem Persianischen Messer/
 so mir auch darneben meine Por-
 tatera, in welchem ich etliche mein
 vñd meines Herrn sachen ge-
 habt / sintemal sie mich einen
 Christen zu sein erkennenet / erle-
 digen) nicht fortzukommen / de-
 rowegen ich/mir vom Könige ge-
 schenckte Roß dahindē verlassen
 müssen/ also wiederumb mit dem
 Persianischen Legaten / jedoch
 mit grosser gefahr vñd mühe im
 Ianuario an die Moscoviterische
 Grenzen nach Cois, so eine klei-
 ne Festung / hart vnter dem ho-
 hen vorerwenten Gebirge / vñd
 am Caspischen Meer ligend/ an-
 gelanget / mit sonderlichen gros-
 sen freuden / In derselben Fe-
 stung

stung denn allzeit tausend Mos-
 scowiterische Soldaten von dem
 Großfürsten aus Moscau zu
 beschützung des Landes / vnd dar-
 mit die Moscowiter desto sicherer
 Daß auff dem Meer haben könn-
 nen / gehalten / daselbsten nicht
 viel vbriges / vnd sonderlich win-
 terszeit gar oft / weder zu beissen
 noch zu brocken ist / außgenommen
 Seefische / so sie Sommerszeit
 an der Sonnen trocknen / vnd
 Habermeeel / daran sie ein we-
 nig Wasser giessen / vnd dasselbe
 also vor Brot essen / so auff Mos-
 scowiterische Sprach Tolockna
 genennet wird / ist gar ein arm-
 selige Speiß. In diesem ort
 haben wir vns in die sechs Wo-
 chen lang (weil es dazumal win-
 ter / auch wegen vngestümigkeit
 des

des Meeres / der Eißschollen /
 vnd sonsten fortzukommen / vns
 möglich gewesen) gedulden müs-
 sen / Als wir nu wenig zum vor-
 rath / vnd vns die noth endlich
 gedrungen / haben wir vns mit
 grosser gefahr (vngeachtet daß
 vnser Schiff gar schlecht provi-
 antiret / vnd wenn vns der wind
 were zu wider gewesen / vns gar
 leicht in der Feinde hende hette
 verschlagen können / deren wir
 denn auff allen seiten gehabt / o-
 der sonsten hungers hette ster-
 ben müssen) wiederumb auffge-
 macht / vñ nach Tereg vnd Astar-
 chan, dahin etliche 50. meilen ge-
 wesen / zugesägelt / Es ist vns a-
 ber / wie folget / zimlich bekomen :
 Denn als wir ohngefehr dreissig
 Welscher meilen von Tereg an
 eine

eine kleine Insel / etwan eine
 Deutsche meile lang vnd breit /
 kommen / ist es von demselben ort
 an / bis an die Stadt noch ganz
 vnd gar / jedoch nicht an allen orten
 zugefroren gewesen / Den andern
 tag auch zuuor der Wind
 das Eiß auch gar hinder vns geschlagen /
 daß wir also 14. tage
 an dem ort haben zu Ancora liegen
 müssen / Das Profiant / so
 wir mit vns gehabt / hat auch
 end genommen / haben derowegen
 zwei Roß / so der Gesandte
 mit sich geführet / schlachten vnd
 auffessen / vnd das schilff / dessen
 da eine grosse menge gewesen /
 haben wir vns Holz brauchen /
 vnd damit feuer machen müssen.
 Folgendes ist so ein sehr kaltes
 Wetter wiederumb eingefallen /

S

daß

daß wir endlich gezwungen wor-
 de/die Schiff daselbsten neben etz-
 lichen Wächtern zuverlassen/vñ
 also zu fuß vber das Eiß (ob wol
 mit nicht geringer gefahr) bisz
 gen Tereg zu gehen/Vnd dieweil
 denn auch das gefaltene See-
 wasser die art an sich hat / daß
 es alsbald zu schmelzen pfleget/
 vnd wir nun etwan mit Eisz-
 wetter vberfallen worden / wir
 allzumal hetten ersauffen vnd
 ombkommen müssen. Als wir
 aber nun/Gott lob/den Strand
 erreicht / haben vber dreyhun-
 dert Moscawiter vnser gewar-
 tet/vnd Rosz gebracht / mit gros-
 ser solennitet angenommen / vnd
 in die Stadt geführet / da wir
 denn nu durch Gottes gnad das
 größte vnglück vberstanden.

Diese

Diese Stadt Terecka liget
 hart/ vnd ohngefehr eine Deut-
 sche meilweges vom Gaspischen
 Meer/ vnd etwa zwö Zagreisen
 von Derbent, so eine Türckische
 Festung/ welche den Moscawi-
 tern vnd Persianern/ wenn die
 Schiff dahin geschlagen werden/
 auch sonst durch Raub auffm
 Meer grossen schaden zufüget.
 Folgenden 18. Martij seind wir
 wiederumb auff's Meer gefessen/
 vnd nach Astarhan gesägelt/ vñ
 den 23. dito glücklichen ankomen/
 auch allda bis auff den Carfrey-
 tag/ vnd bis die Schiff verfertiz-
 get worden/ erwarten müssen/
 vnd also wiederumb auff den oft-
 erwehnten flusz Volga gefessen/
 vnd das Wasser auffwärts / da
 vns denn von den Moscawitern

F ij leute

leute zugegeben / nach Cassan zu
 führen. Als wir dahin kommen/
 ist uns ein Persianische Bot-
 schafft / so aus Moscau wieder-
 umb zu ihrem König in Persiam
 gereiset / bekommen / so berichtet /
 daß der Großfürst dem Persia-
 ner etliche tausent Mann / neben
 auch etlichen vornemen Feldt-
 stücken zur Festung Derbent zu
 eröbern zugeschickt / welcher den
 auch gewiß sonsten den Persia-
 ner mehrenteils wider den Tür-
 cken in Harnisch gebracht. Wenn
 dem ermeldte Festung eröbert
 würde / ich der meinung / daß
 Meer und Strassen derer ort
 des Türcken halber desto sicherer
 sein möchte. An diesem ort seind
 auch zu uns komen die vornemste
 zweene Tartarische Negauische
 Für-

Fürsten / einer Ieroslan, der an-
 der Estreck genennet / so von den
 Moscoviterischen Cosacken ge-
 fangen worden / vnd sich dem
 Großfürsten vntergebē müssen /
 auch des Estrecks sein Sohn in
 Moscau getaufft / mit einer rei-
 chen vom Adel verheyratet / vnd
 also zum Pfand behalten wor-
 den / welche bis anhero dem
 Türcken in Hungern wider die
 Christen gedienet / vnd denselben
 grossen schaden zugefüget / sind
 mit vns in Moscau gefüret wor-
 den / vnd also mir nach glücklicher
 ankunfft vom Großfürsten ein
 zimmer Zobeln / vnd etliche ellen
 Sammet verehret worden / etc.

Von dar aus hab ich meinen
 Weg durch Polen / Schlesien
 vnd Behem wiederumb zu rück

F iij gez

genommen / vnd Gott lob vnd
danck / glücklich zu Prag ange-
langet / ankommen.

Psalm. 116.

Wie sol ich dem HERRN
vergeltten alle seine Wohl-
that / die er an mir thut ?

E N D E.





Leipzig

Ben Michael Lanßenberger /

In verlegung Henning Grossen
des jüngern / Buchhändlers /

Im Jahr 1608.

[Ob Bl. 25 verso]

[Faint rectangular stamp or title at the top of the page]




[Faint rectangular stamp or title below the illustration]

[Faint, illegible text, possibly a title or description, located below the illustration]

[Faint text at the bottom of the page, possibly a signature or date]





83 2 174 07


3

ULB Halle
004 871 189



56.
D

1077



H. M. J. A. 2

Handwritten text on the spine, including numbers and possibly names, which are mostly illegible due to fading and the angle of the image.





Kurze vnd warhafftige
beschreibung der Reiß

Son Prag aus/
Durch Schlesien/
Polen/
Moscow /
Tartareyen/

**Bis an den Königlichen
Hoff in Persien:**

So von Georgio Tectandro
von der Jabel / mit verleihung
Göttlicher hülffe Anno 1605. durch
glück vnd vnglück verrichtet
worden ist.

Leipzig.
In verlegung Henning Grossen
des jüngern/ Buchhändlers.
ANNO 1608.

M. G. Simon

